


Noticia
Transparente
di Gobierno

ISLA ONLINE

Diahuebs 1 Februari 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**
2 0 2 4



Gabinete Wever-Croes



CRISIS MANAGEMENT OFFICE A ENTREGA VEILIGHEIDSPLAN ARUBA CARNAVAL 2024 NA PROME MINISTER

Diamars 30 di januari Crisis Management Office (CMO) a haci entrega di e Veiligheidsplan Aruba Carnaval 2024 (Plan di Siguridad di Aruba su Carnaval) na Prome Minister Evelyn Wever-Croes.

Pa prome biaha Aruba tin un Veiligheidsplan Aruba Carnaval. Esaki a wordo traha door di CMO hunto cu SMAC caminda tur grupo di carnaval a participa. Den a plan ta stipula e palabracionnan haci riba diferente aspecto di siguridad pa tur carnavalista.

Cada lider di e gruponan a reuni individualmente cu CMO

y a firma e palabracionnan y asina garantisa e siguridad di participantenan y tur esnan cu ta contribui cu carnaval.

Minister President a expresa di ta contento di por wak cu tin palabracionnan haci riba e tema di decibel. Akinan a palabra con halto e sonido di e bandanan por ta den paradanan di carnaval. Pa paradanan di mucha e maximo ta 90db y e muchanan mester ta 7 meter leu di e speaker y mester tin earplugs bisti.

Tanto Gobierno como CMO ta di opinion cu mester protege muchanan di dañonan permanente na nan oido y na nan

Continuacion CRISIS MANAGEMENT OFFICE A ENTREGA VEILIGHEIDSPLAN.....

salud. Pa loke ta trata adultonan cu ta participa den un forma voluntario y ta responsabel pa nan propio actonan, e maximo ta 120db.

CMO ta haci control durante tur parada a base di e palabracionnan di e Veiligheidsplan y por bisa cu te awor practicamente tur banda a tene nan mes na e maximo di e sonido y durante parada di mucha 95% a uza earplugs.

Prome Minister a felicita CMO, KPA, SMAC, DTI y gruponan cu a forma parti di e plan aki y a cumpli cu ne. E intencion ta pa durante tres aña traha cu e plan aki pa tur evento publico, di mas di 2000 hende y despues adapta unda mester y finalisa e plan.

Aparte di esaki durante paradanan CMO a pone un “hospital on the field” cu ta pa duna asistencia na tur cu ta participa y acudi na e carnaval y asina por alivia nos Hospital Horacio Oduber y nan por sigui cu nan asistencia normal.

“Cu esaki Aruba un bes mas ta duna ehempel den nos region di con ta atende cu siguridad di su ciudadanonan durante eventonan grandi. Y ya drentando simannan final di nos carnaval, Gobierno y CMO ta urgi tur banda y grupo pa cumpli cu palabracionnan haci y pone interes di nos carnavalistanan na prome luga”, Prome Minister Evelyn Wever-Croes a remarca.





MINISTER XIOMARA MADURO

A BISHITA COLEGIO SAN HOSE Y SCOL SOEUR JULIETTE

Nos muchanan a siña mas di e celebracion di Dia di Betico



Finalisando e bishitanan escolar en conexion cu Dia di Betico, Minister Xiomara Maduro encarga cu Cultura, a bishita Colegio San Jose y Scol Soeur Juliette pa asina combersa cu e muchanan riba e celebracion aki.

Riba e prome bishita di e mainta aki na Colegio San Jose, e mandatario a wordo ricibi cu alegria pa tur e alumnonan y nan maestronan cu a sali pa dune un caluroso bonbini.

Despues di esaki, Minister Maduro a bishita klas 6 pa asina combersa cu e muchanan riba Dia di Betico, pa splicanan e importancia di e logronan di Betico pero tambe pa inspiranan pa sigui studia y persigui nan aspiracionnan. Usando Betico como ehempel, e mandatario a inspira e muchanan pa semper kere den nan mes y tambe bay pa locual cu nan kier logra. E mandatario a finalisa e bishita hungando un wega cu e muchanan cu tabata tin Dia di Betico como tema.

E mainta a finalisa na Scol Soeur Juliette unda cu Minister Maduro a haya e oportunidad pa cuminda e alumnonan di e scol aki y tambe combersa cu nan riba Dia di Betico y kico e dia aki ta nifica pa nos. Mester menciona cu e muchanan tabata sumamente contento cu e bishita di e mandatario y comparti cune con nan lo bay celebra e dia aki.

Minister Maduro ta gradici e cabesante y maestronan di Colegio San Jose y Scol Souer Juliette pa a ricibi'e y permiti'e comparti un rato ameno cu tur e muchanan y tambe di por a contanan un tiki mas di e celebracion di Dia di Betico. E mandatario a invita e muchanan y nan mayornan pa celebra e dia aki y asina hunto biba nos cultura.





MINISTER DI SALUD PUBLICO A REUNI CU REPRESENTANTENAN DI SOCIAAL ECONOMISCHE RAAD (SER) PA ASINA POR CONSEHA RIBA E TOPICO DI PREVENCION DI OBESIDAD NA ARUBA.



Diaheubs mainta Minister di Turismo y Salud Publico sr. Dangui Oduber a reuni cu Dhr. drs. Felix Bijlhout, Algemeen Secretaris di De Sociaal Economische Raad (SER) y tambe cu Dhr. Norberto Rodrigues MPP, Beleidsadviseur di SER.

Un reunion unda SER a entrega un raport na Ministerio di Salud Publico pa asina nan por conseha ariba diferente asuntonan importante manera obesidad na Aruba.

Un bon reunion unda a elabora ariba diferente topiconan manera; preocupacion di e aumento di obesidad den nos comunidad y avisa pa pone medidanan mas severo, inversion den conscientisacion pa muchanan na scol, mas cantina saludabel na scolnan y prevencion di sucu excesivo y pone ilustra kiko ta cumindanan mas y menos saludabel.

Minister Dangui Oduber ta indica cu reunionnan asina ta importante pa evalua e raportnan, notas y conseho tocante e cuido y salud di nos comunidad, pa asina por implementa cambio positivo den e manera cu nos ta come y move. E vision di Minister Oduber ta pa tin un comunidad

saludabel y pa traha hunto cu diferente organisacionnan pa asina por combati obesidad na Aruba.

Minister Oduber ta expresa su gratitud pe bishita di e representanten di SER y ta spera cu pronto por anuncia cambio nan positivo den comunidad y asina yuda mas hende posibel cu ta luchando cu obesidad.





ARUBAVERSE 2.0 DIALOGANDO RIBA TEMA DI FOREIGN EXCHANGE, CYPTO TRADING Y MAS NA THE HUB SAN NICOLAS

Arubaverse 2.0, organisa pa e unidad di Exprodesk di DEACI, ta ofrece diferente tayer interesante riba diferente topico di tecnologia digital moderno. Diaranson 31 di januari a tuma luga e di cuater (4) tayer, caminda a focus pa capacita e publico den e mundo compleho di mercado financiero ("trading"), incluyendo Stocks, Forex, Binary Options, y Crypto Currency (criptomoneda).

Exprodesk a colabora cu ITFM Global FX y Elite Trading Academy Aruba. Ta mira oportunidadnan pa desaroyo personal y profesional, unda e habitantenan di San Nicolas y di Aruba por probecha di e oportunidadnan cu e mercado financiero mundial ta ofrece. Sin embargo, esaki ta bini cu su set di desafionan y riesgonan.

Ta vital pa nos publico ta bon informa tocante e riesgonan asocia cu inversion, particularmente den area manera Forex, Binary Options y Cryptocurrency. Na banda di fluctuacion di balor, tambe ta enfrenta un enemigo cu ta constantemente ta modifica su strategia – e "Scammers". P'esei, ta importante pa nos pueblo ta arma cu e conocimiento necesario pa identifica y evita intentonan pa estafa nan.

Ademas, a trata e tema di 'market makers', e psicologia y control emocional den comercio, y e razonnan pakico comerciantenan frecuentemente ta perde placa den e mercado financiero; ta aspectonan crucial cu mester enfatisa den nos programanan educativo. Tambe ta pone un enfasis fuerte riba prueba y transparencia pa asegura cu cada participante den ArubaVerse 2.0 y mas aya, ta actua den un manera responsabel y etico.

"ArubaVerse 2.0 no ta solamente ta un paso adelante pa San Nicolas y Aruba, pero tambe un paso pa un futuro di conocimiento pa nos pueblo. Nos ta mira e oportunidadnan grandi, pero tambe nos ta consciente di e desafionan cu ta presenta, y ta agradecido pa e colaboracion cu e diferente stakeholders riba e topico", minister Geoffrey Wever ta opina.





A APROBA INVERSION MIYONARIO PA UN SISTEMA DI PORTOFOON Y MOBILOFOON NOBO PA HENTER CUERPO POLICIAL DI ARUBA

Dialuna, Minister di Husticia y Asuntonan Social sr. Rocco Tjon a aproba e oferta, cual e comicion multidisciplinario a scoge, pa e compra di portofoons nobo pa henter Cuerpo Policial di Aruba

Manera ta conoci, tin hopi inversionnan tumando luga pa cu Cuerpo Policial. Inversionnan cu ta toca e parti di infraestructura, material pero tambe e parti organisatorio.

Ta asina cu, ya pa algun luna tin un ekipo multidisciplinario trahando pa yega na portofoons nobo pa Cuerpo Policial. Esaki ta un di e "tools" di mas importante pa e Agente Policial por eherce su trabou optimalmente. Di e forma aki, e por garantiza su propio seguridad y e integridad di Cuerpo Policial aun mas.

Pa prome biaha cada Agente Policial lo haya su propio portofoon, y di e forma aki, manera a indica, ta bay eleva seguridad pa e Agentenan, pero na mes momento ta trata na evita kiebronan di integridad pa loke ta acceso na informacion. Pa e motibo ey tambe a percura pa e "encryption" di mas sofisticada.

Banda di esaki, mester remarca cu tur e autonnan nobo pa Cuerpo Policial, cual por cierto a yega Aruba caba, tambe lo wordo ekipa cu "mobiolofoons". Di e forma aki nos lo sigui inverti den nos departamentonan hudicial e lunanan nos dilanti.

Por ultimo, Minister Tjon kier a gradici e ekipo cu a percura pa e proceso aki wordo encamina manera debe ser y alabes scoge "portofoons" di calidad halto pa henter Cuerpo Policial di Aruba.



MINISTER ENDY CROES A ATENDE REUNION CU PARLAMENTARIO SHAILINY TROMP – LEE

A trata varios punto di interes riba e tereno di enseñansa.



Siman pasa, Minister Endy Croes a reuni cu parlamentario Shailiny Tromp – Lee, kende ta presidente di comision fiho di enseñansa den Parlamento di Aruba. Un reunion amplio unda a trata diferente topico di interes. Minister Endy Croes a indica cu tin dos (2) reunion programa pa tuma luga den luna di februari cu den comision fiho di enseñansa den parlamento, unda lo trata, entre otro, e “normbedrag”.

Manera ta conoci, desde 2010 no a ahustae “normbedrag”. Pues, e “normbedrag” tabata core 13 aña atrasa. E “normbedrag” ta ancla den ley y ta e compensacion cu schoolbesturen ta ricibi a traves di “exploitatiesubsidie”.

E “normbedrag” ta cubri costo di, entre otro, mantencion y seguro di e edificio di scol y lokaal, limpieza di edificio y lokaal, coriente, awa y gas, mantencion di mueble di e scolnan, inversion den material di desaroyo “hulpmiddel” y necesidadnan di scol, lesmateriaal y administracion.

E schoolbesturen ta ricibi un suma cu hopi biaha ta miyones di

florin, depende di e grandura di e scol pa cubri tur gasto cu a ser menciona.

E ley ta bisa cu cada tres (3) aña mester calcula si mester aumenta e suma aki. Minister Endy Croes hunto cu Gabinete Wever – Croes II a corigí esaki, unda cu a haal in te cu aña 2023. Pues, un total di dies (10) aña di retraso otorgando 6.4 miyon florin. E suma aki a keda aproba durante reunion publico den Parlamento di Aruba. Esaki ta significa cu a inverti hopi mas placa den enseñansa pa asina e schoolbesturen por cubri nan gastonan.

Tambe, Minister Endy Croes lo duna informacion actualisa di e Doorlichting Rapport y e recomendacionnan den e Landspakket. Ademas di esaki, lo trata recomendacion 11 cu ta regarda e leynan di enseñansa y con leu esakinan ta den e proceso di ehecucion. Concluyendo, Minister Endy Croes a enfatisa cu e tabata un tremendo reunion y lo keda traha hunto pa progreso y bienestar di enseñansa di Aruba.



Gobierno di Aruba a decreta aña 2024 como Aña di Stabilidad y Prosperidad. Esakinanan ta fundeshi cu e generacionnan Arubiano prome cu nos a bin ta preparando pa nos generacion. Despues di e pandemia global di COVID-19, nacionnan rond mundo a encontra retonan sin precedente cu a pone nan resiliencia y adaptabilidad na prueba. Aruba, un perla den Caribe, a sali di e periodo dificil no solamente mas fuerte, pero tambe cu un vision y compromiso renoba pa Stabilidad y Prosperidad.

CONCEPTO DI LOGO:
Ale Garido
Tusy Henricus

DESIGN DI LOGO:
Ale Garido

Splicacion di LOGO:
Tusy Henricus

E STREA DI NOS BANDERA:

E strea ta un recordatorio di e forza di nos bandera, e resiliencia di nos pueblo pero specialmente e orguyo di ta Arubianonan luchado, superando retonan cu determinacion pa engrandece nos pais.

SERO DI HOOIBERG: STABILIDAD

Un Sero ancla firme den e curason di nos isla, ta un simbolo di e forza y resiliencia di nos comunidad y e estabilidad financiero despues di tormentanan pisa. Manera e Sero di Hooiberg, nos ta lanta cu forza inkebrantabel, y ta enfrenta desafionan cu mesun firmesa. Manera e sero ta risisti e pruebanan di tempo, cada un di nos tambe, como ciudadano, ta mantene nos mes firme, inspirando nos mes den e estabilidad di e Sero di Hooiberg y nos ta supera obstaculonan pa nos sigui progresa.

Asina manera e Sero di Hooiberg ta para haltu y stabiel, e paisahe finansiero di Aruba a logra sostene e tormentanan di e pandemia. E dedicacion di nos gobierno na responsabilidad financiero, diversificacion economico, y maneho prudente, a permiti Aruba subi na halturanan nobo di estabilidad cu ta inspira confiansa na inversionistanan y ta stimula crecemento economico sostenibel.

ALOE: PROSPERIDAD:

E mata di Aloe ta simbolisa Prosperidad. Un mata resiliente cu ta adapta su mes den condicionnan dificil y diverso. Asina e pueblo di Aruba a transforma adversidad den oportunidad. E compromiso di Aruba pa diversificacion economico y desaroyo sostenibel a permiti prosperidad den e economia di nos pais. Manera e veld di aloe ta florece, asina e paisahe economico di Aruba ta florece.

E propiedadnan curativo di aloe ta refleha e naturalesa di renobacion di esfuersonan economico di Aruba. Door di innovacion, tecnologia, practicanan sostenibel y sigur iniciativanan cu vision pa un futuro resiliente, Aruba no solamente ta recupera for di retraso cu e retonan a ocasiona, pero tambe ta florece den direccionnan nobo y prospero.

CIRCULO DI UNION:

E circulo ta simbolisa e union, forza y solidaridad di nos pueblo. Esakinan no solamente a resisti e retonan di e pandemia, pero a haci nos mas fuerte como un comunidad. Manera un circulo cu ta keda conecta, nos pueblo a keda uni, resiliente mustrando asina cu union ta nos forza pa logra.

Door di union, no solamente nos a pasa e tormenta, pero a traha un caminda pa un futuro na unda huntu, nos ta keda para mas fuerte, conecta, y prepara pa afronta cualkier reto cu ta bin den nos caminda.



Arte di Muraya na San Nicolas no ta simplemente
verf riba bloki. E creatividad, fantasia y color riba e
murayanan ta un fuente di inspiracion di artistanan
pa encurasha nos pa brasa e poder di creatividad y
colaboracion na nos barionan di Aruba.

2024

AÑA DI STABILIDAD Y PROSPERIDAD